



CONVENIO DE COLABORACIÓN ENTRE A SECRETARÍA XERAL DE MEDIOS E A ASOCIACIÓN DE ENXEÑEIROS DE TELECOMUNICACIÓN DE GALICIA PARA O DESENVOLVEMENTO DUN PROXECTO DE COMUNICACIÓN E INFORMACIÓN SOBRE O SEGUNDO DIVIDENDO DIXITAL

Santiago de Compostela, 14 de outubro de 2019.

SUBSCRIBEN

Dunha parte, _____, secretaria xeral de Medios, en virtude do disposto na Disposición adicional segunda do Decreto 76/2017, do 28 de xullo, de estrutura orgánica dos órganos superiores e de dirección dependentes da Presidencia da Xunta de Galicia (administración colaboradora).

Doutra parte, _____, Presidente da Asociación de Enxeñeiros de Telecomunicación de Galicia (en adiante AETG), en nome e representación da citada entidade, de acordo coas facultades que ten conferidas en virtude do artigo 24 dos Estatutos desta Asociación (entidade colaboradora).

As partes recoñécense capacidade e competencia suficientes para formalizar o presente Convenio de colaboración, e para o efecto

EXPOÑEN

Primeiro. Secretaría Xeral de Medios

A estrutura e funcións da Secretaría Xeral de Medios establécense no Decreto 76/2017, do 28 de xullo, de estrutura orgánica dos órganos superiores e de dirección dependentes da Presidencia da Xunta de Galicia.

No seu artigo 3 establécese que *“A Secretaría Xeral de Medios é o órgano superior da Administración xeral da Comunidade Autónoma de Galicia encargado de executar a política xeral da Xunta de Galicia en materia de medios de comunicación social, correspondéndolle o exercicio, entre outras, das funcións de dotación de infraestruturas no ámbito da comunicación e a implantación de redes propias de comunicación audiovisual e televisiva para a prestación de servizos que sexan competencia da comunidade autónoma, de acordo co establecido na Lei 7/2010, de comunicación audiovisual.”*

A Disposición adicional segunda deste Decreto establece que *“quedan desconcentradas nas persoas titulares das secretarías xerais dependentes da Presidencia, (...) as competencias: (...) administrar os créditos de gastos dos orzamentos do seu centro directivo. Aprobar e comprometer gastos (...), recoñecer as obrigas económicas e propoñer o seu pagamento, as demais competencias atribuídas ás persoas titulares das consellerías en materia orzamentaria, agás o capítulo I (...), todas as facultades que a normativa vixente na materia atribúe aos órganos de contratación, así como a formalización de convenios (...), a aprobación das bases, a convocatoria e as resolucións en materia de axudas e subvencións do seu respectivo ámbito de competencia (...).”*

Segundo. Asociación de Enxeñeiros de Telecomunicación de Galicia (AETG)

1. A AETG é unha asociación sen ánimo de lucro inscrita no Rexistro Central de Asociacións da Xunta de Galicia o 4.05.2004.

2. O artigo 3 dos seus estatutos establece que a asociación posúe un obxecto social que abrangue, entre outros, os seguintes fins:

- A contribución ao desenvolvemento e progreso da Comunidade Autónoma de Galicia a través da difusión e potenciación das telecomunicacións
- Atender as consultas que lle poidan ser feitas polo Estado, Organizacións Estatais, Administración Autónoma, Administración Central do Estado, Corporacións Oficiais ou particulares e enxeñeiros de telecomunicación, nas actividades relacionadas coas telecomunicacións.
- Manter informados das novidades e cuestións de interese no sector das telecomunicacións.





A AETG dispón dun equipo de traballo específico integrado por enxeñeiros de telecomunicacións con ampla experiencia no soporte centralizado para o correcto cumprimento destes fins e ten ademais un especial interese na liberación do segundo dividendo dixital, tendo en conta o seu obxecto social. Para iso, porá ao servizo de todos os axentes implicados o seu coñecemento e experiencia co fin de elaborar un proxecto de comunicación e información no ámbito dos concellos da Comunidade Autónoma de Galicia.

Terceiro. Colaboración entre as partes.

A liberación do segundo dividendo dixital supón un cambio significativo no ámbito do desenvolvemento das telecomunicacións. Neste senso a AETG ten un especial interese na liberación do segundo dividendo dixital terrestre, tendo en conta o seu obxecto social.

A AETG considera de utilidade colaborar na comunicación e na difusión da información relativa ás actuacións necesarias para a liberalización do 2º dividendo dixital nos municipios galegos, contribuíndo á adaptación da sociedade galega ao desenvolvemento tecnolóxico en materia de telecomunicacións.

A Secretaría Xeral de Medios considera conveniente aproveitar esta iniciativa da AETG para divulgar información sobre o 2º dividendo dixital no ámbito dos concellos da Comunidade Autónoma de Galicia.

En suma, existe un interese común entre as dúas partes por levar a cabo unha difusión o máis ampla posible sobre a liberación do 2º Dividendo Dixital, polo que se considera oportuno e beneficioso para o interese público que a AETG lle preste a súa colaboración á Secretaría Xeral de Medios, na realización destas actuacións.

2. As actuacións instrumentaranse a través da figura do convenio de colaboración coa AETG, non sendo posible promover a concorrència pública.

Na súa virtude, as partes asinan o presente convenio de colaboración de acordo coas seguintes

CLÁUSULAS

Primeira. Necesidade, oportunidade e obxectivo da actuación.

Este convenio de colaboración ten como obxecto establecer as bases polas que se regulará a colaboración entre a Secretaría Xeral de Medios e a AETG, para o desenvolvemento dun proxecto de comunicación e información sobre as redes e servizos afectados polo 2º Dividendo Dixital, no ámbito da Comunidade Autónoma de Galicia.

A liberación do segundo dividendo dixital terrestre desenvolverase dentro do marco normativo establecido pola Decisión (UE) 2017/899 do Parlamento Europeo e do Consello, do 17 de maio de 2017, sobre o uso da banda de frecuencias 470-790 na Unión Europea, que ten como obxecto garantir un enfoque coordinado do uso desta banda na Unión Europea e polo Real decreto 391/2019, do 21 de xuño, polo que se aproba o Plan Técnico Nacional da Televisión Dixital Terrestre e se regulan determinados aspectos para a liberación do segundo dividendo dixital.

Neste senso, a liberación do segundo dividendo dixital configúrase como un proceso polo que os Estados membros da Unión Europea autorizarán o uso da banda de frecuencia de 694-790 MHz (banda de 700 MHz) para os sistemas terrestres capaces de prestar servizos de comunicacións electrónicas de banda larga sen fíos, e liberarán a dita banda de frecuencias da utilización actual dos múltiples dixitais da televisión.

No Plan Técnico Nacional fíxanse as condicións básicas nas que se producirá o proceso de reordenación do espectro e de liberación das canles radioeléctricas que deben ser abandonadas, co fin de asegurar a dispoñibilidade da subbanda de frecuencias 694-790 MHz, para que poida ser utilizada para a prestación de servizos de comunicacións electrónicas, de acordo co establecido na normativa europea.

Na Comunidade Autónoma de Galicia hai instalados uns 300 centros de extensión de cobertura da televisión dixital no eido rural, ao amparo da disposición adicional duodécima do Real decreto 944/2005, do 29 de xullo, polo que se aproba o Plan técnico nacional da televisión dixital terrestre, nos que existen emisións de televisión dos múltiples dixitais na banda 694-790 MHz, e que deben cambiar de frecuencia para liberar a dita banda para os novos usos asignados.

A liberación do 2º dividendo dixital ten como consecuencia importantes cambios que afectan aos usuarios do servizo de Televisión Dixital Terrestre. Por tanto, é fundamental que todas as persoas e entidades afectadas poidan ter información sobre os aspectos da liberación do dividendo que lles afecten nos seus concellos. Este Proxecto de





Comunicación configúrase como un elemento fundamental para acadar o obxectivo de informar nos distintos concellos de Galicia do alcance da liberación do 2º dividendo dixital, realizando unha análise individualizada por centro de extensión de cobertura de emisión de cada concello, tendo en conta as súas propias peculiaridades.

Segunda. Obxecto.

Este convenio de colaboración ten como obxecto establecer as bases polas que se regulará a colaboración entre a Secretaría Xeral de Medios e a AETG, para o desenvolvemento dun proxecto de comunicación e información sobre as redes e servizos afectados polo 2º Dividendo Dixital, no ámbito da Comunidade Autónoma de Galicia.

Terceira. Orzamento.

De acordo co orzamento elaborado pola AETG, o custo das actuacións previstas neste convenio ascende a un total de 97.806,20 euros, segundo a desagregación que figura no Anexo II deste convenio, que será sufragado coa achega de ambas as dúas partes.

O reparto de financiamento é o seguinte:

	Importe	%
AETG	15.018,00	15,35500%
Secretaría Xeral de Medios	82.788,20	84,64500%
Total	97.806,20	100,00000%

A Secretaría Xeral de Medios comprométese a financiar un importe máximo de **82.788,20** euros á entidade colaboradora para compensar parte dos custos nos que incorra para a realización das actividades derivadas deste convenio, sen que supoña enriquecemento ningún para a entidade colaboradora.

Esta achega impútase con cargo á aplicación orzamentaria 04.20.461B.640.0, correspondente a créditos dos orzamentos xerais da Comunidade Autónoma para o ano 2019, na que existe crédito adecuado e suficiente.

Cuarta. Obrigas das partes.

1. Serán obrigas de ambas as partes:

- Determinar o departamento ou unidade directamente responsable do cumprimento dos fins do convenio, e sinalarase un coordinador ou interlocutor por cada entidade asinante.
- Coordinar e orientar conxuntamente as tarefas que son obxecto deste convenio e conformar a información ou documentación resultante.
- Sinalar e recoñecer a autoría do proxecto elaborado, que será de uso común para as partes asinantes dentro dos fins incluídos no contexto deste convenio.

2. Serán obrigas da Secretaría Xeral de Medios :

- Colaborar coa AETG para a elaboración da documentación de difusión, cos datos de que dispón a Administración Autonómica, en relación aos centros de extensión de cobertura de televisión nas zonas afectadas polo 2º Dividendo Dixital, a súa cobertura e poboacións afectadas, así como aquela outra información sobre o acceso ás infraestruturas e as actuacións a realizar por parte da AETG.
- Facilitar á AETG os medios tecnolóxicos específicos de acceso a información dos centros relacionados no Anexo I.
- A Secretaría Xeral de Medios realizará unha xornada informativa dirixida á AETG sobre a cobertura da televisión dixital e sobre os recursos de acceso á información, incluíndo os datos actualizados que á súa vez lle facilite a Administración Xeral do Estado en relación coas actuacións previstas no Plan Técnico Nacional da Televisión Dixital Terrestre.
- Aboar o importe correspondente, logo da xustificación da execución total ou parcial das accións a desenvolver, e de acordo co establecido neste convenio para os pagamentos.





3. Serán obrigas da AETG:

- a. A AETG realizará labores presenciais de comunicación e información respecto das consultas que os concellos relacionados no Anexo I poidan realizar en relación coa implantación do 2º Dividendo Dixital.
- b. A AETG levará a cabo un proxecto de comunicación e información dirixido ás entidades locais, ás asociacións e colexios profesionais de administradores de fincas, ás asociacións de instaladores de telecomunicacións e aos usuarios da televisión dixital terrestre dos municipios de Galicia.
- c. Gardar o debido segredo profesional e non divulgar o proxecto de comunicación elaborado en execución deste convenio mais aló da necesaria difusión do instrumento asinado.

Quinta. Pagamento e xustificación.

1. O pagamento realizarase unha vez realizadas as actuacións obxecto deste convenio, logo da correspondente xustificación. A AETG deberá presentar unha memoria xustificativa que comprenderá as actuacións realizadas no marco deste convenio, incluíndo o Plan de comunicación e divulgación e a descrición e número de visitas aos centros e municipios.

2. A Orde do 26 de febreiro de 2015 pola que se regulan o Punto xeral de entrada de facturas electrónicas e o Rexistro Contable de Facturas da Comunidade Autónoma de Galicia, establece que todas as facturas de importe superior a 5.000 euros presentaranse a través do Sistema Electrónico de Facturación da Xunta de Galicia (SEF), configurado como Punto xeral de entrada de facturas electrónicas

A entidade colaboradora debera presentar a factura e a memoria xustificativa coas actuacións realizadas no Sistema Electrónico de Facturación da Xunta de Galicia (SEF).

O SEF proporcionará ao presentador un xustificante de recepción electrónica no cal constarán, como mínimo, a data e a hora de presentación, o órgano xestor destinatario e o número de asento rexistral da factura. Así mesmo, incluírá un código seguro de verificación que permitirá en calquera momento validar ante o sistema a exactitude do documento.

O Rexistro Contable de Facturas estará integrado co SEF. A anotación no rexistro contable de facturas é requisito previo necesario para a tramitación do recoñecemento da obriga.

A información sobre este será a través das seguintes URL:

<http://conselleriadefacenda.es/factura> ou <http://www.conselleriadefacenda.es/sicon/>

No proceso de carga das facturas electrónicas no SEF deben cumprimentarse os seguintes datos:

CONSELLERÍA:	Presidencia da Xunta de Galicia
ÓRGANO DE CONTRATACIÓN:	Secretaría Xeral de Medios.
UNIDADE DE CONTRATACIÓN:	Servizo de Estudos e Coordinación de Medios
CIF:	S1511001H
CÓDIGO INTERNO SEF:	066
CÓDIGOS DIR3:	
CÓDIGO DA OFICINA CONTABLE:	A12009376
CÓDIGO DO ÓRGANO XESTOR:	A12024275
CÓDIGO DA UNIDADE TRAMITADORA:	GE0013715
DIRECCIÓN DA UNIDADE TRAMITADORA:	Edificio San Caetano s/n, 15781 Santiago de Compostela
PUNTO DE ENTRADA AUTOMATIZADA DE DATOS (FACE):	http://conselleriadefacenda.es/factura http://www.conselleriadefacenda.es/sicon/





Sexta. Avaliación e seguimento. Comisión de seguimento, vixilancia e control.

Co fin de realizar o seguimento e avaliación dos resultados, así como a interpretación e cumprimento do presente convenio, as partes asinantes conveñen a constitución dunha comisión mixta de avaliación e seguimento, que será paritaria e estará integrada, como mínimo, por un representante da Secretaría Xeral de Medios e un representante da AETG. A comisión reunirase a petición de calquera das dúas partes.

Sétima. Vixencia. Prórroga.

O presente convenio estará vixente dende a data da súa sinatura e ata o 27 de decembro de 2019, e non será prorrogable.

Oitava. Causas de resolución.

Serán causas de resolución:

- a) O transcurso do tempo estipulado sen que se realizasen as actividades acordadas.
- b) O mutuo acordo das partes asinantes.
- c) O incumprimento de calquera das cláusulas que regulan o presente convenio de colaboración.

Novena. Modificación do convenio.

De acordo co artigo 31.4 da Lei 14/2013, do 26 de decembro, de racionalización do sector público autonómico o convenio poderá ser obxecto de modificación cando teña por finalidade o logro dos obxectivos de estabilidade orzamentaria e sustentabilidade financeira.

As ditas modificacións terán por obxecto a redución do volume das obrigas ou, no caso de que este convenio teña carácter plurianual, a ampliación do seu prazo de execución.

De acordo co artigo 4.2 da Lei 2/2011, do 16 de xuño, de disciplina orzamentaria e sustentabilidade financeira de Galicia entenderase por estabilidade orzamentaria a situación de equilibrio ou superávit estrutural en termos de capacidade de financiamento acorde coa definición contida no sistema europeo de contas nacionais e rexionais.

Decima. Relación laboral.

A subscrición do presente convenio non suporá a existencia dunha relación funcional, laboral ou de calquera outro tipo entre a Administración e o persoal da entidade colaboradora que vaia desenvolver as actividades, de maneira que non se lle poderá esixir á Xunta de Galicia ningunha responsabilidade, nin directa nin subsidiaria, polos actos ou feitos acaecidos no desenvolvemento do mesmo.

Decimo primeira. Publicación.

Os datos básicos relativos a este convenio serán publicados de acordo co previsto no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de convenios da Xunta de Galicia.

Décimo segunda. Protección de datos.

Ambas as partes asumen as obrigas que lles corresponden derivadas do Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos) (DOUE L 119 di 4.5.2016), e pola Lei Orgánica 3/2018, do 5 de decembro, de protección de datos persoais e garantía dos dereitos dixitais.

O responsable do tratamento é a Secretaría Xeral de Medios e a finalidade do tratamento son as actividades necesarias para xestionar este convenio. As persoas interesadas poderán acceder, rectificar e suprimir os seus datos, así como exercer outros dereitos a través da sede electrónica da Xunta de Galicia ou en calquera das oficinas de Rexistro e información propias da Xunta de Galicia, segundo se recolle en <https://www.xunta.gal/exercicio-de-dereitos>. Contacto delegado de protección de datos de e información adicional: <https://www.xunta.gal/informacion-xeral-proteccion-datos>





Décimo terceira. Réxime xurídico.

Este convenio de colaboración ten natureza administrativa e o seu réxime xurídico virá determinado polas estipulacións previstas no propio convenio e o resto de normativa aplicable.

As cuestións litixiosas xurdidas sobre a interpretación, modificación, resolución e efectos que puidesen derivarse da aplicación do presente convenio deberán resolverse pola comisión mixta de avaliación e seguimento.

Contra as mesmas caberá interpor recurso contencioso administrativo diante da xurisdición contencioso administrativa.

Co fin de resolver as dúbidas e omisións que puidesen presentarse, aplicaranse os principios recollidos na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

A secretaria xeral de Medios	O Presidente da Asociación de Enxeñeiros de Telecomunicación de Galicia
------------------------------	---

